

Na osnovu člana 46. Zakona o sestrinstvu i primaljstvu (Sl.novine FBiH br. 43/13), člana 55. stav 1, alineja 23, člana 64, te članova 38., 78., 79., 80., i člana 81. Statuta Komore medicinskih sestra-tehničara Zeničko-dobojskog kantona, Skupština Komore, na prijedlog Upravnog odbora Komore, na svojoj sjednici održanoj dana 21.03.2023. godine donosi:

PRAVILNIK

O DODJELI NAGRADA I PRIZNANJA KOMORE MEDICINSKIH SESTARA-TEHNIČARA ZENIČKO-DOBOJSKOG KANTONA

I OPŠTE ODREDBE

Član 1.

Odredbama Pravilnika o dodjeli nagrada i priznanja Komore medicinskih sestra-tehničara Zeničko-dobojskog kantona (u daljem tekstu Pravilnik), utvrđuje se postupak i način dodjeljivanja nagrada-priznanja Komore medicinskih sestra-tehničara Zeničko-dobojskog kantona (u daljem tekstu: Komore).

Član 2.

Za postignute uspjehe u radu i savjesno izvršavanje zadataka, u znak priznanja, Komora može pohvaliti i nagraditi članove Komore.

Komora može pohvaliti i nagraditi i udruženja, ustanove, organizacije i druga pravna i fizička lica, za ostvarenu saradnju i pomoć Komori.

Član 3.

Nagrade i priznanja se dodjeljuju povodom 12. maja, Međunarodnog dana sestrinstva.

II NAGRADE I PRIZNANJA KOMORE

Član 4.

Oblici priznanja i nagrada su:

1. Priznanje za životno djelo
2. Zlatna plaketa
3. Srebrna plaketa
4. Priznanje za poseban doprinos
5. Zahvalnica

Član 5.

PRIZNANJE ZA ŽIVOTNO DJELO

Priznanje za životno djelo kao najviše priznanje Komore, dodjeljuje Komora na prijedlog Predsjednika Komore, Opštinskih povjereništava i Zaključka/Prijedloga Komisije.

Upravni odbor Komore medicinskih sestara - tehničara, donosi Odluku o dodjeli nagrade članu Komore na osnovu sljedećih kriterija:

- Minimalno 30. godina radnog staža u oblasti sestrinstva;
- Za lične zasluge na unapređenju sestrinske struke kroz rad u Komori i zdravstvenim ustanovama, a koji je svojim radom doprinjeo rješavanju zdravstvenih problema stanovništva, posebno ugroženih grupacija;
- Članovi Komore koji su svoj rad posvetili unapređenju zdravstvene njege i edukacije medicinskih sestara-tehničara, dali nemjerljiv doprinos u izradi i objavi radova na domaćem i međunarodnom planu;
- Za usklađivanje odnosa među zdravstvenim radnicima, unapređenju zdravstvene njege, efikasnosti zdravstvene njege, postignutim uspješnim rezultatima na stručnom usavršavanju medicinskih sestara-tehničara u zemlji i inostranstvu putem uspostavljene saradnje sa drugim Komorama;

Godišnje se može dodjeliti jedno priznanje za životno djelo.

Član 6.

ZLATNA PLAKETA

Priznanje Zlatna plaketa dodjeljuje Komora članovima Komore na prijedlog Predsjednika Komore, Opštinskih povjereništava i zaključka/prijedloga Komisije.

Upravni odbor Komore medicinskih sestara - tehničara, donosi Odluku o dodjeli nagrade članu Komore na osnovu sljedećih kriterija:

- Za Lične zasluge na unapređenju sestrinske struke kroz rad u Komori i zdravstvenim ustanovama, a koji je svojim radom doprinio rješavanju zdravstvenih problema stanovništva, posebno ugroženih grupacija;
- Članovi Komore koji su svoj rad posvetili unapređenju zdravstvene njege i edukacije medicinskih sestara-tehničara, dali nemjerljiv doprinos u izradi i objavi radova na domaćem i međunarodnom planu;
- Za usklađivanje odnosa među zdravstvenim radnicima, unapređenju zdravstvene njege, efikasnosti zdravstvene njege, postignutim uspješnim rezultatima na stručnom usavršavanju medicinskih sestara-tehničara u zemlji i inostranstvu putem uspostavljene saradnje sa drugim Komorama;

Godišnje se mogu dodjeliti dvije Zlatne plakete.

Član 7.

SREBRNA PLAKETA

Priznanje Srebrna plaketa dodjeljuje Komora članovima Komore na prijedlog Predsjednika Komore, Opštinskih povjereništava, zaključka/prijedloga Komisije i odluke Upravnog odbora.

Priznanje se dodjeljuje članu Komore koji je:

- Kandidat zaslužan za rad Komore i unapređenje struke kroz svoj rad i doprinos;
- Kandidat koji je radio na afirmaciji Komore, zdravstva, sestrinstva i dao doprinos povezivanju i saradnji sa Komorama i Udruženjima u zemlji i inostranstvu, a sve u interesu sestrinstva i struke;
- Kandidat koji je dao veliki doprinos u predstavljanju medicinskih sestara-tehničara na domaćoj i međunarodnoj zdravstvenoj sceni.

Godišnje se mogu dodjeliti tri Srebrne plakete.

Član 8.

PRIZNANJE

Priznanje dodjeljuje Komora članovima Komore na prijedlog: predsjednika Komore, Opštinskih povjereništava i zaključka/prijedloga Komisije za dodjelu nagrada.

Upravni odbor donosi odluku o dodjeli Priznanja Komore članovima Komore koji su u pravilu više od 15 godina u radnom odnosu i drugim pojedincima u zemlji i inostranstvu, koji su dali značajan doprinos u promociji vrijednosti Komore, za pomoć koju su pružili u ostvarivanju njenih temeljnih zadataka, promociji stručnih, naučnih i etičkih načela.

Godišnje se može dodjeliti pet priznanja u povodu Dana sestrinstva.

Član 9.

ZAHVALNICA

Zahvalnicu dodjeljuje Komora članovima Komore koji odlaze u penziju.

Upravni odbor Komore donosi odluku na osnovu dostavljenih podataka zdravstvenih ustanova o penzionisanju medicinskih sestara-tehničara članova Komore, ili po ličnom zahtjevu penzionisanih/umirovljenih članova Komore.

Broj zahvalnica nije ograničen pri dodjeli.

III PREDLAGAČI ZA PRIZNANJA I POHVALE

Član 10.

Predlagači za Priznanje za životno djelo, Zlatnu plaketu, Srebrnu plaketu, Priznanje

za poseban doprinos i Zahvalnicu mogu biti:

1. Opštinska povjereništva;
2. Predsjednik Komore;
3. Upravni odbor Komore;

IV KOMISIJA

Član 11.

Komisija za dodjelu nagrada broji tri člana: predsjednik i dva člana. Komisija u okviru svojih nadležnosti obavlja sljedeće poslove:

- predlaže jedinstvene kriterije za nagrađivanje u oblasti sestrinstva, vrste nagrada, kao i postupak za dodjelu nagrada;
- učestvuje u izradi Pravilnika o dodjeli nagrada;
- provodi postupak dodjeljivanja nagrade u skladu sa Zakonom o sestrinstvu i primaljstvu, Statutom i Pravilnikom o dodjeli nagrada;
- sačinjava prijedlog kandidata za dodjelu nagrada i isti dostavlja Upravnom odboru na usvajanje;
- obavlja ostale poslove predviđene Statutom i drugim aktima Komore;

SAZIVANJE SJEDNICA

Član 12.

Predsjednik Komisije saziva sjednicu Komisije za dodjelu nagrada.

Sjednice se održavaju u prostorijama Komore na kojima se vodi zapisnik, redni broj sjednice, datum održavanja sjednice, početak, završetak sjednice i prisutan broj članova.

Član 13.

Sjednica Komisije za priznanja i pohvale se može održati samo ako je prisutan kvalifikovani broj članova komisije.

Članovi komisije moraju biti pismeno obavješteni o datumu i vremenu održavanja sjednice najkasnije 7 dana prije zakazane sjednice.

Član komisije koji nije u mogućnosti prisustvovati sjednici, obavezan je o istome obavijestiti Generalnog sekretara Komore najmanje 48 sati prije održavanja sjednice.

NAČIN RADA KOMISIJE

Član 14.

Svi prijedlozi za dodjelu priznanja i pohvala Komore, podnose se Komisiji pismeno, na propisanom obrascu upitnika za predlaganje nagrada i priznanja, najmanje 30 dana prije 12. maja od strane Komisije za dodjelu nagrade Upravnom odboru Komore sa jasno navedenim razlozima kandidovanja predložene osobe za nagradu ili pohvalu o kojoj će donositi odluku Upravni odbor.

Komisija neće uzeti u razmatranje prijedloge poslane nakon navedenog datuma.

Komisija može po potrebi od predlagača zatražiti pisane nadopune ili pojašnjenje u skladu sa kriterijima iz ovog Pravilnika. Komisija neće uzeti u razmatranje nepotpune prijedloge.

Članovi Komisije razmatraju pojedinačno sve pristigle prijedloge, u raspravi iznose svoje mišljenje i utvrđuju da li su prijedlozi u skladu sa odredbama ovog Pravilnika, Statuta Komore i Zakona o sestrinstvu i primaljstvu (Sl. Novine Federacije BIH br.43/13 član 46“).

Članovi Komisije izrađuju listu prijedloga za dodjelu priznanja i pohvala i dostavljaju Upravnom Odboru Komore na odlučivanje.

Ukoliko kandidat za dodjelu nagrade priznanja ne zadovoljava uvjetima za dodjelu predloženog priznanja, Komisija će razmotriti, u okviru mogućnosti, prijedlog za dodjelu drugog priznanja –nagrade.

Član 15.

Članovi komisije glasaju javno.

Odluka je punovažna ako su svi prisutni članovi Komisije glasali.

Član 16.

Na temelju liste prijedloga za dodjelu priznanja i pohvala Komisije, Upravni odbor donosi odluku o dodjeli Priznanje za životno djelo, Zlatna plaketa, Srebrna plaketa i Priznanje za poseban doprinos

Javne pohvale, priznanja i plakete dodjeljuju se u pismenom obliku koji utvrđuje Upravni odbor Komore, kao i visinu novčane nagrade, a u skladu sa finansijskim mogućnostima Komore.

Član 17.

U komori se vodi knjiga priznanja i pohvala u koju se upisuju sva dodjeljna priznanja i pohvale.

PRELAZNE I ZAVRŠNE ODREDBE


Član 18.

U prilogu ovog Pravilnika objavljuje se obrazac (upitnik) za predlaganje priznanja.

Priznanje za životno djelo, Zlatna plaketa, Srebrna plaketa, Priznanje za poseban doprinos.

Član 19.

Ovaj Pravilnik stupa na snagu danom donošenja

Predsjednik Skupštine

Bajramović Amel, dipl.med.tehničar

01-17/2023

Zenica, 21.03.2023. godine

